

Nzryrkr Pita Kx Ayrnrngr Natq Ngr Nzaplxtqngr Mz Nzryrkr Pita Kx Ayrnrngr

Aposol Pita yrle letz lc mz mzlr yiz 62—64 AD mz nibr nzmcrngr mz Jisz, mzli kc tqmnc-ngrde Rom. Zbz mz yiz 67 AD sc tztqlvztrpe nide mz kros. Mzli lc Niro nide king kxetu kc Rom, x leplz kxtrnzrlxngitiung nzpibqtilr x nzaetqbzlr drtq kxnzvv-nqblqlr Jisz.

Pita ryrbz mz lrJiu x kxtrngiulrJiu kcng tzrlxngiting mz provins kcng Pontzs, Galesia, Kapadosia, Esia x Bitinia, mz kandre kc Trki mzli ka. Pita krlzle kx leplz nzatrkatilr nidr x nzaetqbzlr drtqdr. X ryrbz badr mz nzapqtr-krbzle drtwrdr x mz nzrpi-krbzle badr kx namnclzbzng mz zmatq ngr kxetu rdrng x navz-nqblq-zvzlr me pnz drtwr Gct, kxmule-esz' da kx prtz. X rpi-kzpzle badr kx Gct rlr-ngrbzle da kxtrka nzprtilzkrdr nigu, mz nazplrkrde nzbrtikr drtwrgu nide.

¹ Ninge Pita, aposol ne Jisz Kxnzmcp. Ryrbo bamu nimu leplz kcng tqmcp Gct mz nzngini-krmu lr mrkzbleng mz nrlc ka, murde mrnyzmu angidr Heven. Nimu kcng tzakiting nrlc mz provins kcng Pontzs, Galesia, Kapadosia, Esia x Bitinia.

² Yrlq pnz Gct Trte drtwr kx namcp. Nimu mz nzngini-krmu doa kxnztr nedeng. X Mqn-grkxtr atrle nimu x okatrle nimu mz nzvz-

nqblq-krmu Jiszs KxnzmcpX. Murde suti drtwr Gct kx naipqpxbzle alwx ngrmung mz mepyr ngr nzbzkr Jiszs. Krka'-ngrne kx Gct sa navz zvz nzkao-krbzle bamu zmrlz ngrde kxmyalz x nzmnc-zpwxngr.

Drtwrgu Elalzm Mz NzobqtixpX-krGu NzlungR Kxboi

³⁻⁴ Na-awibzku mz Gct kc tqngi Trte Kxetu rgu Jiszs KxnzmcpX. Murde mz zmrlz ngrde kxmyalz batrple bagu nzprtr-krGu mz nzlungR kxmrna. Lxngitiku Jiszs KxnzmcpX kc tqatulz-mop Gct mz nzbzngR x prtr-kzku mz nzlungR kxboi. X obqtixpku da kxmrlzting amrlx kx nzyrlq-bekapxlR mz nzka-krmlrleng bagu Heven. Murde da lcng trnayrkrpxu x trnatekqtru, a' sa nayc-along.

⁵ A' mzli ka mz nrlc ka, zmatq ngr Gct o-ngalelvzpele nimu murde abtrpzmu drtwrmu bade mz nzarlax-krde nimu. X sa na-acle-angidrlle nimu navz nakrlzbzle nzyzlu-krm Jiszs. X mzli lcde, sa na-aelwapX-ate-ngrbzle bamu da kxmrlzting amrlx lcng tzvzpxmqng mz nzarlaxpe-krde nimu.

⁶ Delc kxmule-esz' prtramu mz da kxtrka kxnzkqlung mzli kxmrbcne, a' sc tqabrtzpe-ngrnamu da lcng.

⁷ X da kxtrka lcng nzokatr-kzlr nimu, mz nzapu-krdr nyr kc tqayrleni-ebirngr gol, mz nzrkax-krde zblqki rde. Murde nztu-amqngi-krmu axplrle nzrlxngiti-krmu x Gct rlr-ngrbzle

nzprtzk r da lcng mz nzaxplrngr nzrlxngiti-krmu. Murde mz drtwrde nzrlxngiti-angidr-krmu myaszpx-zlwzle gol kxlqngi kx trnayc-alou. X mzli kc nayzlu-ngrm Jiszs Kxnmcp x mz nrlc, nzrlxngiti-angidr-krmu lc nabatrpzle mz Gct nzabrtzlvz-krde nimu, nzglqpx-krde nimu, x nzamatq-krde nimu.

⁸ Murde kxmule-esz' trmcwamuu Kxnmcp x, a' mrlztiamu nide x brti drtwrmu nide, mz nzalalz-zlwz-krm drtwrmu. X rblx nzrpingr nzetukr nzabrtz-krmu lc.

⁹ Murde kalr mrkc Heven, sa naprtramu mz bz ngr nzlxngiti-krmu Jiszs, mzli kc tqarlapx-alo-ngrde nimu.

¹⁰ Profet kcng bqnc, nzpipx-pnzlr kx Gct naokatrle nimu mz zmrlz ngrde kxmyalz. Kxmule-esz' nzsuti zlwz drtwrdr nzkrz-krdr drtwr ngr nzarlapxngr lc, a' trnzkrzlr drtwr ngr da amrlx kcng tzpipxl.

¹¹ Mqngr Kraes kc tqmncpxm badr pipx-zvzle nzetqkr drtq Kxnmcp x da kxmrlz-esz'ngr kcng naprtzting mz nibrde. X profet lcng nasuti drtwrdr nzkrz-krdr ncblo kznike kx nanginide Kxnmcp lc x myx mzli kx naprtzng da lcdeng x nike naprtzm mz nrlc ka mzli lcde.

¹² X aelwapx-ngrbz Gct badr kx natq kcng tzpipxl trngiu dalr nzokatr-krde nidr esz'-krdr, a' ngi dalr nzokatr-krde nimu lcng tzvzmqng mz nibr nzngidatikr natqdr. Murde Mqngrkxtr kc tqatwzlr-ngrm Gct Heven rpibzle bamu kx natq profet lcng nzngidatipeng mz Jiszs Kxnmcp, kc tzyapwxtipxbzlr bamu mz Nrpakxmrlz. X mzli boipe enjrl nzsuti-kzng drtwrdr nztwz-krdr

drtwr ngr da lcdeng.

Gct Kqlele Nigu Mz Nzmcncngr Kxtr

¹³ Mz nzm-krde lcde, oliqtiamu drtwrmu mz nzvz-nqblqngr me pnz drtwrde x aclve-lzbqamu. X na-aoti txpwz drtwrmu da kxmrlzting kcng tqobqtipxamu nzrka-ngrbz bamu mzli kc nayzlu-ngrm Jiszs Kxnmcpx.

¹⁴ X mz nzngini-krmu doa neng Gct kx nzvz-nqblqlr natqdeng, bzkq vz-nqblqamu nqm q nr nabzmu kxtrka kcng tqaleamu ena, mzli kc trkrlzkalamu nzalvztrngr angidr.

¹⁵ A' mzli ka, nzmnc-krmu natr, da kc tqwai nztrkr Gct kc tqkqlele nimu.

¹⁶ Murde rpile mz Nzryrngrkxtr kx, “*Nzmc-krmu natr; murde nzmnc-krnge tr.*” ☆

¹⁷ Na-aoti drtwrmu kx Gct Trtemu kc tqkrka'bzmu bade, nzmc-krde leplz rsakrlrngr. Murde sa na-ayzclubzle bam nike aleq mz nrlc ka. Mz nzm-krde lcde, namyatitramu nide mz da amrlx kcng tqaleamu mz nzngini-krmu lr mrkzble mz nzmnc-krmu mz nrlc ka. *

¹⁸ Na-aoti kz drtwrmu kx trngiu trau o silvz o gol kc tqxpengr Gct nimu mz nzkapx-krmle nimu mz nqm q kx trmatqu kc tzaprcbz melrmq-mung bamu. Murde trau x silvz x gol nzklzlr nztrkangr.

¹⁹ A' xpetrle nimu mz da kx myapx-esz'ngr, krlcde mepyr ngr Kxnmcpx. Murde bz-ngrde nimu mz

☆ **1:16** Livae 11:44-45; 19:2; 20:7 * **1:17** Nzamatq-krqu Gct namyaszpxle nzamatq-krqu da x leplz, kxmule-esz' mrnyzgu o lr mrnyzgu. Murde mz nzngini-krqu doa nedeng, apuku lr mrkzbleng mz nrlc ka. X na-aoti zvz drtwrgu kx mrnyzgu angidr Heven.

nznngini-krde blz kxmyapx-esz'ngr x nei sip kx lqngipx-esz'ngr.

²⁰ Kxnzmcpx lc tqngi nei sip kx nangi blz kc tqmcpx pnz Gct mzli kc nrlc trnzwzka-ngrde. X mzli ka, sc tqaelwapxpe-ngrbz Gct bamu kx Jiszs nide lrpzki r nzarlapxngr nimu.

²¹ X mz nzaxvctr-krbzmu mz Jiszs, brtipe drtwrmu Gct kc tqatulz-mople nide mz nzbzngr x kabzle bade me matq-esz'ngr Heven. Mz nzmukrde lcde, Gct txpwz kc tqabrtrpzmu drtwrmu bade x tqobqtipxamu mz nzatutr-krde da amrlx kcng tqesalz-ngrbzle bamu.

²² Mz nzlxnngiti-krmu Nrpa Angidr, katxpxbzle da amrlx kcng tzipwa'-ngrdr nzmrlzti-lzbq-krmu mz nzapu-pe-krmu mzle-lzbqng x ile-lzbqng. X mzli ka, na-aelwapx-zvz-ngrbzmu nivz angidr lc mz kztemung mz nabzmu atwrnrngr.

²³ Murde prtrpeamu mz nzlungr kxmrna, kx trpnzngr nzyrkrpx-krde. Murde vzpxm mz Jiszs Kxnzmcpx kc tqngi Natq Gct kc tqlu-alo. ✧

²⁴ Da kc tqwai, nzpikr Nzryrngrkxtr le kx, *“Leplz amrlx sa nayrkrpxng mz nzapu-krdr nabr kxglr. X zluli rdr apule nrpq nounc kcng tzplclq-tiong.*

²⁵ *A' natq Kxetu yctx alo.”* ✧ X natq lcde ngi Nrpa ngr Kxnzmcpx kc tzyapwxtipxpebz bamu.

2

¹ Mz nzmukrde lcde, yrlqpx-lzbqamu mz drtwr kx mwa, nzpokianger, nzrkcmzngr x nzrpibqtingr.

² A' nasutitx zlwz drtwrmu nztwz-krmu drtwr ngr natq Gct, mz nzapu-krmu itoto kx suti txpwz drtwrde nei pqde. Murde dekc nzbrtikr drtwrmu kx rlapx-angidrpeamu naetunepx zvz.

³ X krlzpeamu kx Kxetu rgu mrlz-esz'ngr.

KxnzmcpX Badr Leplz Nedeng Nidr Mrkc Tqtr Nyz Gct

⁴⁻⁵ Namnc-aepztr-zvzbzmu mz KxnzmcpX kc tqngi Nou Rplz kc tqlu-alo. Murde apu-kzamu rplz kcng tqbatrpzle nzmwitr-lxblr-krdr mz drkq ngr ma nyzde kc tqtr, mrkc tqmncpx-ngrm Gct. A' nimu rplz kcng tzlung. X nimu kz pris kxnztr nede kcng twztrpzng bade, mz nzlrpx-krbzmu bade blz ngr nzrglqlzngr nide, nzawingrbz bade, nzangiongr nide x nzmncz-ngrbz bade. X blz lcng nzmrlzng mz nzobqkr Gct murde nzaxvctrpzmu mz Jiszs KxnzmcpX. ☆ X kxmule-esz' Jiszs nide rplz kx myatxpx-zlwzbz kc tqmcpX Gct, a' kzdung leplz nzpxtxpx-ngrdr nide. ☆

⁶ Gct ycmnetr-ngrde Mrlxde mz Nzryrngrkxtr mz nzrpi-krde kx, *“Obqmamu! Murde yrlqpex kc doa mrkc Jerusalem kx apule rplz kx myatxpx-zlwzbz, murde nide kc tqngi rplz kc tzatuo kai, tqngi nou bute' kc tqmcpXX. Doa kx lxngitile nide drtqde trnamyau mz nzbrtikr drtwrde nide.”* ☆

⁷ Delc, nimu kcng tzrlxngiting tqkrlzamu kx nide kxmyapxbz. A' Nzryrngrkxtr rpibzle mz leplz kcng trnzrlxngitiung kx, *“Rplz kc etu*

☆ **2:4-5** Asaea 61:6; Rom 12:1; Filipae 4:18; Hibru 13:15-16

☆ **2:4-5** Matiu 21:42; Mak 12:10; Luk 20:17; Aposol 4:11; 2 Korint 6:16; Efiszs 2:20-22 ☆ **2:6** Asaea 28:16

tzpxtxpx-ngrdr ncblo kcng tztwz-ngrng ma, nzael-wapxngr kx nide nou rplz kc tqmyatxpx-zlwzbz."

☆ *

⁸ X rpi-kzle kx, "Nide rplz kx nayrputrngr leplz mz nzobqszo-krdr nide." ☆ X nztaong murde nzpxtxpx-ngrdr nrpa kc tqycmnetr-ngrde nide mz Nzryrngrkxtr. Krlc vz-nqblqle drtwr kc tqyrlq pnz Gct mz leplz lcng mzli kc bqnc.

⁹ A' nimu "nqvi kc tqmcpX Gct," x "pris kcng tztwztrpzng mz King rgu" Jiszs. X ni-kzpu' "dzbede kxtr kc tzamnc-bekapX Gct," murde nangunimu "angidr leplz ne Gct esz'-krde." X kqlele nimu mz nzyapwxtipx-krbzmu mz leplz zmrlz ngrde kxmyalz. X kapxmle nimu mz zmatq ngr alwx, murde naprtramu mz nzkriz-angidr-krmu nide.

☆

¹⁰ Murde Nzryrngrkxtr alvztr-ngrde nigu kx "mzli kc trnginipwa'muu leplz nedeng," a' mzli ka "nipemu leplz neng Gct." X mzli kc "trprtrwamuu mz nivz lrde," a' mzli ka "mrlzti-zlwzpele nimu."

☆

Navz-nqblqku NqmQ Kr Gct Mz Nzmcn-krqu Mz Mzlr Kxtrnzrlxngitiung

¹¹ Mzlengeng x inwengeng, na-apuamu lr narnrlc x lr mrkzbleng mz nzmnc-krmu mz nrlc ka, murde mrnyzmu angidr Heven. Mz nzmu-krde lcde, bzkq rlr-lzbq-ngrbzmu mz da kxtrka

☆ **2:7** Sam 118:22 * **2:7** Rplz lc drtwr ngrde Jiszs KxnxmcpX. X kxnxpxtxpx-ngrdr nide drtwr ngrde ncblo kx nzmailzlr lr Israel. [Asaea 28:14] ☆ **2:8** Asaea 8:14; Rom 9:33 ☆ **2:9** Nzrlaszng 19:5-6; Asaea 43:21; Jeremaea 13:11; Malakai 3:17 ☆ **2:10** Hosia 1:10; 2:23

kx suti drtwr nrkrdrdqmu, murde ma tzaovxiolr nimu.

¹² A' nqmq krmu natubq zvz mz nzmnc-krmu mz mzlr leplz kxtrnzrlxngitiung. Murde kxmule-esz' nzymne-atrkatilr nimu, a' sa nam-clr nztubqkr nqmq krmu. X kzdung nidr mwx sa nalxngiti-kzlr Jiszs x naglqpxlr Gct mzli kc nayzlu-ngrm Jiszs. ☆

Namnczbzmu Mz Zmatq Ngr Kxnzetung

¹³ X mz nzamatq-krmu Kxetu rgu Jiszs, namnczbzmu mz zmatq amrlx kcng tzyrlqzbz bamu. Abzo mz king o gzpman kc tqaclvele nimu,

¹⁴ nakrlzbzle leplz kznike nzatwzlr-ngrdr mz nzayrplapx-krdr kxnzvvz-rbrng x mz nzamatq-krdr kxnzaleng da kxmrlz.

¹⁵ Murde nzale-krmu da kxmrlz awx-nabule leplz kxdrka'ngr kcng tzpibqtilr nimu. X krlc me pnz drtwr Gct.

¹⁶ Kxnzmcpv arlapxle nimu mz nzmncz-krbzmu mz zmatq kxtrka amrlx. Mz nzmu-krde lcde, bzkq ale-mouamu da kxdrka'ngr, a' rlrpx-lzbqamu mz nzwztr-krbzmu mz Gct.

¹⁷ Amrlueamu leplz amrlx. Mrlztiamu kztemung kxnzrlxngiting. Myatitramu Gct. X amatqamu king.

¹⁸ Nimu kcng tzawz-nrbalqng, namnczbzmu mz zmatq ngr kxetu rmung mz nzamatq-krmu nidr, kxmule-esz' nzaclve-zpwxlr nimu o nza-trkatilr nimu.

¹⁹⁻²⁰ Trabrtzlvzu Gct nimu mz nzetqkr drtqmu mzli kc kxetu rmung nzayrplapx-ngrdr nimu

mz nzvz-rbr-krmung. Murde takitrde nzale-krdr da lc. A' Gct sa na-abrtzlvzle nimu mz nzamatq-zvz-krmu kxetu rmung murde mrlzti-
amu Gct. Myapxbz mz nzetqkr drtqmu kxmule-
esz' nzatrkatikrdr nimu trpnzngr noude.

²¹ Murde suti drtwr Gct kx navz-nqblqamu Kxnmcpx kc drtqde tqetq mz nzarlax-krde nimu.

²² Murde Profet Asaea ycmnetr-ngrde nide mz nzrpi-krde kx, “*Trpnzngr alwx ngrde. X trpnzngr nzpokia-krde.*” ☆

²³ A' mzli kc tzpibqti-ngrde, trpnzngr natq kx ayzclubzle badr. ☆ X mzli kc tzaetq-ngrbz drtqde, trpnzngr natq ngr nzamwxlrngr kx pi-mopwzle badr, a' abrtr-zvzbzle drtwrde mz Gct kc tqtubq mz nzayzlu-krbzle da mz leplz.

²⁴ X tekqtrle nigu mz nzxpe-krde alwx rgung mz nzrtqlvztrngr nrkrdrtqde mz kros. X arlapxle nigu mz zmatq ngr alwx, murde nzmnc-krgru natubq-esz'ngr. Delc nzatakingr nide tqamrlzpe-ngrde nigu. ☆

²⁵ Mzli kc apuamu sip kx nzmrbrng kcng tzmnc-rlrubzng mz kxetu rdr. A' mzli ka yzlu-pebzmuz mz Kxetu kc tqaclve-angidrlle nimu mz nznginipe-krmu sip nedeng. ☆

Olvz Kxnzyrlzng X Ncblo Ngrdrng

3

¹⁻² Mz nqmqlcpwz, nimu olvz kxnzyrlzng nam-nclzbzmu mz ncblo ngrmung. Murde kzdung nimu kcng ncblo ngrdrng trnzlxngitikalr natq

☆ **2:22** Asaea 53:9 ☆ **2:23** Asaea 53:7 ☆ **2:24** Asaea 53:4-5

☆ **2:25** Asaea 53:6

Gct, kxmule-esz' tryapwxtipxpwzmuu Nrpakxm-rlz badr, a' mwz nzmc-krdr nzmrlzkr nqmq krmung x nztubq-krdr, sa navectrple nidr mz Gct.

³ Bzkq angrlo-txpwzmu nrkrdrtqmu kx nalxngipx-esz'ngr, mz nzrbx-krmu nqngi narmu, nzrluti-krmu da kx ngi gol x nzpxi-krmu lrpz kx mzte luli. Murde da lcng trnzmyapxpwzung.

⁴ A' nzlxngipx-krmu navzpxm mz nabzmu. Murde nzlxngipxkr nabz rblx nzyrkrpx-krde mzli kc nanginipe-ngrmu blang. A' nzlxngipxngr kx vzpxm mz nabz kx vz-nabu x avzo-lzbq ngi da kx myapx-esz'ngr mz nzobqkr Gct.

⁵ Krlc nqmq krdr olvz kxnztrng kcng bqnc tz-abrtrpzlr drtwrdr mz Gct. Murde nzlxngipx-krdr vzpxm mz nzmnc-lz-krbzlr mz ncblo ngrdrng.

⁶ Da kc tqwai Sera mz nzvz-nqblq-angidr-krde natq Ebraam, x mz nzamatq-krde nide mz nzrpi-krbzle bade nide kxetu rde. X sa na-apuamu Sera, nzmu trnamwxlrwamuu nzatrkat-ingr nimu mz nzale-krmu da kxmrlz.

⁷ X mz nqmq lcpwz, nimu ncblo kxnzyrlzng namnc-zpwxamu badr olvz ngrmung, mz nzkr-lz-krmu kx nzxplrkr ncblo myaszpxle nzxplrkr olvz. A' na-amatq-kzamu nidr mz nznigini-krdr kztemung kcng tzprtr-kzng mz nzlungr kxboi. Nzmnc-krmu nakxmule lc, murde Gct na-ayzlubzle nzkrka'-krmung.

Kzung Mzli Drtqgu Nzaetq Mz Nzale-krqu Da Kxmrlz

⁸ X mou, nimu amrlx ngrmu namnc-zpwx-lxblramu, naycng drtwrmu kztemung, namrlz-

tiamu kztemung na-apulr kx mzlemung angidr, na-avzo-lzbqzbzmu badr, x naokatramu nidr.

⁹ Bzkq ayzklubzmu da kxtrka mz da kxtrka. X bzkq pibqtiamu krkcng tzpibqtilr nimu. A' rlxtibzmu mz Gct nzamrlz-krde nidr. Murde krcl me pnz drtwrde x sa na-amrlz-kzle nimu mz nzale-krmule.

¹⁰ Murde Nzryrngrkxtr rpile kx, “?Nike suti drtwrm? ?Nzlungr kxmrlz kxboi? Obq-angidr x bzkq ycmne-atrkatiq leplz. X bzkq pokiaq.

¹¹ Prszpx nqm q kxtrka. X ale zvz da kxmrlz. X nasuti drtwrm nzmnc-zpwx-krmu badr leplz mz nrwx.

¹² Rlxtibz ncblo kxtubq mz Yawe nzokatr-krde nide. X Yawe sa naxlrbzle nzkrka'-krde mz nzacive-krde nide. Sa napnanatile leplz kxnzalezvzng da kxtrka.” ✧

¹³ Nzmu kx tqvqti drtqmu nzalengr da kxmrlz, mw x trpnzng kx na-aetqbzle drtqmu.

¹⁴ A' nzmu kx tzaetqng drtqmu mz nzale-krmu da kxmrlz, sa namrlzbz bamu kalr. ✧ Murde Nzryrngrkxtr rpile kx, “Bzkq kxne drtqmu natq ngr nzamwxlrkr leplz nimu.” ✧

¹⁵ A' abrtrpzmu drtwrmu mz Jiszs Kxnzm-cpx mz nzngini-krde Kxetu rmu. X oliq-zvzamu nzayzlu-krbzmu natq krkcng tzveatibzlr kx memule tqlxngiti-ngrnamu Jiszs x nike tqobqtipx-ngrnamu nzlungr kxboi. A' amatqamu nidr x ayzlu-ngrbzmu natqdr mz nivz.

¹⁶ Na-ale-zvzamu da kxtubq, murde narmu naopx angidr mz da amrlx. Mz nzmu-krde lcde, nzmu leplz kx tzpibqtilr nimu mz nqm q krmu

✧ 3:12 Sam 34:12-16 ✧ 3:14 Matiu 5:10; Luk 6:22 ✧ 3:14 Asaea 8:12-13

kxmrlz mz nzvz-nqblq-krmu Kxnmcpx, bzkq da kx naxne drtqmu, murde sa na-amyatibz Gct drtqdr kalr.

¹⁷ Nzaetqngr drtqmu mz nzale-krmu da kxmrlz kx pnz drtwr Gct myaszpxle nzaetqngr drtqmu mz nzale-krmu da kxtrka.

¹⁸ Murde Kxnmcpx kc tqtubq nzaetq-ngrbz drtqde nzwrde esz'txu mz nzxpe-krde alwx rgu, nigu leplz kxtrntubqung, murde navzmibzle nigu mz Gct. Nrkrdrdqde nznibq, a' lu-mop mz zmatq ngr Mqngrkxtr.

¹⁹⁻²⁰ X mz zmatq ngr Mqngrkxtr lc, Kxnmcpx sc tqycmnekipxpele Noa mz nzyapwxtipx-krbzle mz leplz kx suti drtwr Gct nzplzpx-krdr alwx ngrdr. A' nzpctxpx-ngrdr nzvz-nqblq-krdr Gct. Krlc mzli kc bqnc tqwzng Noa lcsu kc etu. Mzli lcde Gct kabzle badr mzli r nztekqtr-krdr nqm q nr drtwrdr. A' trtingr, x mzli ka mqngr leplz lcng nzatolvape-ngrng mrnyz mqngr kxnbzpeng. X leplz nzrtqmzng kx nzrlatxpxpwzng mz nubla ngr lue. *

²¹ Leplz lcng nzrlapxng mz nubla ngr lue, da kc tqwai-kzku mz nzrlapx-krdu mz lue ngr nzwrkx-trngr, murde mzli lc brti drtwrgu nztulz-kr-mop Kxnmcpx mz nzbzng. Nzwrkxtrngr trngiu dalr nzwrtipxng zblqki mz nrkrdrdqgu. A' ngi dalr

* **3:19-20** Ngalrde lcng 19-20 nzalvztr-ngrdr nigu kx nayapwxtipxbzku Nrpakxmrlz mz leplz, kxmule-esz' nzpctxpx-ngrdr nigu, da kc tzwai-kzpzlr mz Noa. X kxmule-esz' nigu kcng tzvz-nqblqlr Gct pipzku, a' krlzle nzarlax-krde nigu, da kc tqwaibzle mz Noa badr lr ma nyzdeng. X mou, Kxnmcpx sa na-aovxiolc enqmi rdeng amrlx x sa na-ayrplaxle krkcng tzpctxpx-ngrdr nide, da kc tqwaibzle mz leplz kcng tzbzng mz nubla.

nzkrka'-krbzku mz Gct nzatubqti-krde nigu x nzaopx-krbzle nargu, mz nike alem Jiszs bagu.

²² Mzli ka sc tqwxbupe me matq-esz'ngr Heven mz nrlar Gct kxrtc. X krkcng amrlx Heven, tzm-nclzbzng bade, kxmule-esz' enjrl, o kxnzetung, o kxnzmatqng.

Vz-nqblqamu Lrpzki R Kxnzmcpx

4

¹ Mz nzm-krde lcde, navz-nqblqamu lrpzki r Kxnzmcpx mz nzmnc-krmu. X drtwrmu badr naesz'ti mz nzrlrpx-lzbq-krbzmu mz nzaetqngr drtgmu, da kc tqwaile. Murde krkc tzaetq-zlwzpebz drtgde mz nzvz-nqblq-krde Kraes, aovxiopetele nzatalzng nide mz alwx.

² X mrlx lc, krlzle nzma-nqblq-krde me pnz drtwr Gct vz-krlzbzle nzbz-krde. X trpengr nzvz-nqblq-krde drtwr kxdrka'ngr.

³ Mzli kc ena trlxngitika-ngnamu Jiszs, mzli kang kqlu prtramu mz drtwr kxdrka'ngr sc kxtrnzrlxngitiung. Murde rmwimiamu doa kx trngiu krnalzmu, vz-nqblqamu drtwr kxtrka, rmnq-zlwzamu, trcluwamuu mz da kx myangr drtgmu, x angioamu mqng drka' kxnzlx kxkqlu.

⁴ A' kztemu kcng tqprtrpzmu badr mzli kc, nzpikipelr nimu murde trnzkrzlzru nike trprtrpe-ngrpwzmu badr mz nqm q kxdrka'ngr lcnz mzli ka.

⁵ Kxmule-esz' a' mz Mzli Kxmatq kc navzm, sa natutrpzng mz mz Kxnzmcpx. X sa napibzle mz leplz amrlx kxnztubqng o trtingr, kxmule-esz'

kxznzlubeng o kxznzbpeng. X sa napipxbzlr bade drtwr ngr da amrlx kcng tzalelr mz nzlu-krdr.

⁶ A' kztmung kcng tzbzpeng, mzli kc tzlube-ngrdr nzlxngitlr Nrpakxmrlz kc tzyapwxtipxbz badr. Krlc drtwr ngrde kx kxmule-esz' nzprtrng mz nzayrplapxngr mz nzbzkr nrkrdrtdr, da kc tzwai leplz amrlx, a' mqngrdr nzlu-alobzng mz Gct, mz nzvz-nqblq-krde me pnz drtwrde. *

Nqm̄ Krmu Natubq Mzli Ka Tqaenzli-ngrnamu Nyzylu-krm Jisz

⁷ Ycpe pipz nzyrkrpx-krbz nrlc ka. Mz nzmu-krde lcde, aclvetio-lzbqamu murde nzkrka'-krmu nawz-angidrng.

⁸ X da kx myapxbz mz da amrlx, namrlzti-lzbqamu. Murde Nzryrngrkxtr rpilc kx, "Nivz batrple mz nabzgu nzipq-kr̄gu leplz mz nzq̄lukr alwx ngrdr." ✧

⁹ Abrtzlvzamu nzadwatr-krm kztmung ma nyzmung.

¹⁰ Doa kxes' mz nimu, nawztrpz mz kzt-edeng mz zmatq̄ kxmyapxbz kc tq̄kabz Gct bade. Murde zmatq̄ kxmyapxbz kx bletipx lxlrlcng nawz-lxblrng mz nzaelwapx-krdr zmrlz ngrde kxmyalz.

¹¹ Nzmu kx tq̄kabzle bam zmatq̄ ngr nzryap-wxtipxngr natq̄de, ryapwpxxbz mz leplz mz nzkr̄lz-krm kx Gct kc tq̄rkabz natq̄ kcng tq̄piq̄. X nzmu kx tq̄ngi nzwztr-ngrbz mz leplz le, wztrpz badr mz nzkr̄lz-krm kx Gct kc tq̄rkabz nzxplrng

* **4:6** Mz nibr nzbz-krdr; kxnzrlxngiting trnzprtrpeung mz nzaryplapxkr Gct nidr. ✧ **4:8** Nzryrplapxngr 10:12

bam. Aleamu da lcng murde leplz naglqlz-zvz-ngrdr Gct mz da kx wzngr Jiszs mz nimu. Murde mz nznngini-krde king kc tqmatq takitrde nzrglqlzng nide tqyc tqyc. Eu, angida.

Na-abrtzlvzamu Nzaetq-ngrbz Drtqmu Da Kc Tqwai Nzaetq-ngrbz Drtq Kxnmcpx

¹² Mzlengeng x inwengeng, bzkq kctipxamu nzprtr-krmu mz nzkxpu-zlwzngr mzli ka, murde da kxtrka nzprtz-zvzng. X Gct rlr-ngrbzle da lcng mz nzaxplrng nrlxngiti-krmu.

¹³ A' na-abrtzlvzamu nzaetq-ngrbz drtqmu murde vzpxm mz nzvz-nqblq-krmu me pnz drtwrde, da kc tqwai nzaetq-ngrbz drtq Jiszs Kxnmcpx. Murde mzli kc nayzlu-ngrm Jiszs mz nzmyalz-krde, na-abrtzlvz-kzamu nzprtr-krmu mz nzmyalz-krde lc.

¹⁴ Nzmu kx tzpikiti leplz nimu murde vz-nqblqamu Kxnmcpx, mrlz nzabrtzlvz-krmu da lc. Murde aelwapx-ngrde kx Mqngr kxmatq kc tqvzpxm mz Gct sc tqmncbz bamu.

¹⁵ A' trmrlzu nzmu nzaetq-ngrbz drtqmu mz nznngini-krmu ncblo kxayo, kxpna da, kxale da kxdrka'ngr, x kxrpikiti leplz.

¹⁶ A' nzmu nzaetqbz drtqmu mz nznngini-krmu Kristin, naglqpx-ngrnamu Gct nznngini-krmu nabolr Kraes, mz nztwz-krmu drtqde. X bzkq myangr drtqmu.

¹⁷ Murde mz nzayrplapxkr Gct lr nrlc, yzutr-pele mz nzayrplapx-krde nigu leplz nedeng. Murde suti drtwrde nzatubqti-krde nigu mz da kxtrka kcng tzprtzmqng bagu. X opx angidr kx nzmu na-ayrplapxle leplz nedeng, sa

na-ayrplapx-zlwzle krkcng trnzlxngitilru Nrpa ngrde.

¹⁸ Murde Nzryrngrkxtr rpile kx, “?Nzmu kx rbltx-zlwzbz mz leplz kxnztubqng nzrlapx-krdr; a' myx kxnamu-alzule mz leplz kxnztrkang kxnzale-zvzng alwx?” ✨ †

¹⁹ Mz nzmu-krde lcde, nimu kcng tzaetqzbz drtqdr mz nzvz-nqblq-krde me pnz drtwr Gct, navz zvz nzale-krmu da kxtubq, mz nzabrtr-zvz-krbzmu drtwrmu mz Kxrpalz kc tqwz-ngrde nrlc x na-angidatile natqdeng amrlx.

Da Kx Na-ale Kxnzaclvelr Dzbe Leplz Neng Gct

5

¹ Napibo du da bamu, nimu kxnzaclvelr dzbe leplz neng Gct, mz nzngini-kz-krnge kxacve. Murde krkc tqyapwxtipxx nzmc-krnge nzetqkr drtq Kxnmcpx mz kros. X sa naprtr-kzx mz nzmyalz-krde mzli kc nayzlu-ngrmle.

² Na-acve-angidramu leplz neng Gct kcng tqka-trpzle mz mqmu, mz nzvz-nqblq-krde me pnz drtwrde. Drtwr ngrde kx nzaclve-krmu nidr navzpxm mz nabzmu, a' trngiu da kx nzrtulrtr-ngrbz bamu. X navqti drtqmu nzwztr-krbzmu mz Gct, a' trngiu dalr nzngini-krmu bcnyr o mz nzamatqngr nimu.

✨ **4:18** Nzyrplapxngr 11:31 † **4:18** Gct atubqti-kaile leplz nedeng mz nzrlr-krbzle nzprtr-krdr mz nzetqkr drtqdr, x sc tzprtr-ateng Heven. A' kxnpxtxpx-ngdrdr nide, trnztubqung mz nzobq-krde. X dekc trnaprtr-ngrdru Heven.

3 X bzkq glqpx-lzbqbmzmu badr, a' nangini-zvzbzmu lrpzki mz leplz nemung. ☆

4 Murde Jiszs nide kxetu r kxnzaclvelr sip nedeng. X mzli kc nayzlu-ngrmle, sa nakabzle bamu da kxmrlz kx nayc alo mz nzprtr-krmu mz nzmyalz-krde.

Da Kx Na-ale Kxnzrlxngiting

5 Mz nqm q lcpwz, nimu obla x olvi nam-nclzbzmu mz kxnzaclvelr nimu mz makxtr. X nimu amrlx ngrmu na-avzo-lzbqbmzmu mz kztemung kxnzrlxngiting. Murde Nzryrngrkxtr rpilz kx, "*Gct esablqtile kxnzqlqpx-lzbqng, a' tubz mz nibr kxnzavzo-lzbqng.*" ☆

6 Mz nzmu-krde lcde, avzo-lzbqbmzmu mz Gct kc tqmyalz-esz'ngr, murde na-avzdzle nimu nzkrlez-krbzle mzli kc tqyrlqle.

7 X twzbzmu mz Gct nikeng nzatalvzobzlr nabzmu, murde sa tqaclve-angidrle nimu.

8 Aclvetio-lzbqamu x oliq-zvzamu, murde enqmi rmu Setzn kc tqotaamu badr apule laion kc tqamwxlr-ngrde leplz mz nztukr natqde. X sc tqvz zvz nzrtangrti-krde doa mz nzatrkatikrde nide.

9 A' esablqtiamu nide x tu-amqngiamu mz nzbtrtkr drtwrmu Jiszs. Murde nakrlz-kzamu kx kztemung kxnzrlxngiting amrlx mz nrlc nzprtr-kzng mz nzetqkr drtq mz nzvz-nqblq-krdr Jiszs, da kc tqwaiamu.

☆ 5:3 Matiu 20:25-27; 23:8-12; Mak 9:35; 10:42-44; Luk 22:25-26

☆ 5:5 Nzryrplaxngr 3:34; Jemes 4:6

¹⁰ A' mz nibr mzli kxmrbc kcnq tqetqti drtqmu, Gct esz'-krde sa na-amrlz-moule nimu, sa na-amqngile nzbtrtkr drtwrmu nide, x sa na-axplrle nabzmu, murde navz zvz nzyatr-krbzmu. Murde zmrlz x nzokatrngr amrlx nzvzpxmqng bade. X kqlele nimu mz nzaxvctr-krbzle nimu mz Kxnmcpx, murde rpile naprtr-alo-kzamu mz nzmyalz-krde.

¹¹ Murde nide king kc tqmatq tqvzpe tqvzpe. Eu, angida.

Natq Ngr Nzarlz-lzbqngr

¹² Saelas okatrple ninge mz nzryr-krbo bamu letz lc mrbcne. Krlz-angidrx nznngini-krde mzlegu kx nzbtrti drtwr leplz. Yrbo letz lc mz nzapqtr-krbo drtwrmu x mz nzrpi-krbo bamu kx kxmule-esz' nike prtzbz bamu, a' suti zvz drtwr Gct nzokatr-krde nimu mz zmrlz ngrde kxmyalz. Lolvz-amqngiamu nzbtrtkr drtwrmu nide.

¹³ Lr makxtr kztemung kcnq tzmncng Rom, tqmcpx-kzng Gct, nzrpibzlr bamu kx, "Nimu la." X Mak kz kc tqapubo bade trtede, rpibzle bamu kx, "Nimu la."

¹⁴ Male-lxblramu mqmu mz nivz mzli kc tqrmcti-lzbq-ngrnamu. Krka'-ngrne kx nimu leplz neng Jiszs Kxnmcpx amrlx namnc-zpwxng mz nrwx.

Delape. Ninge *Pita*.

Nzryrngrkxtr Kc Ate Rut x Sam
The New Testament plus Ruth and Psalms is the
Natügu language of the Solomon Islands
Buk Baibel long langguis Natqgu

copyright © 2008 Wycliffe Bible Translators, Inc.

Language: Natqgu (Natügu)

Translation by: SITAG

This translation is made available to you under the terms of the Creative Commons Attribution-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not make any derivative works that change any of the actual words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2017-11-17

PDF generated using Haiola and XeLaTeX on 18 Apr 2025 from source files dated 31 Aug 2023

fb2b7f06-e254-5fb7-b59d-ee21d5d7a93f